

Prof. dr. Mehmed Nurkanović

## Linearne diferentne jednačbe s varijabilnim koeficijentima

Linearna diferentna jednačba s varijabilnim koeficijentima je jednačbi oblika

$$x_{n+k} + p_1(n)x_{n+k-1} + \dots + p_k(n)x_n = r_n. \quad (1)$$

Vidjeli smo da se u slučaju linearnih diferentnih jednačbi prvog reda može doći do tačne formule za njihovo rješenje, čak i u slučaju kad su te jednačbe s varijabilnim koeficijentima. Međutim, u slučaju linearnih jednačbi drugog i višeg reda s varijabilnim koeficijentima ne može se uvijek tako nešto postići. Zbog toga se u takvim slučajevima koriste neki specijalni metodi za njihovo rješavanje. Tako su najčešće korišteni sljedeći metodi: *metod faktorizacije operatora*, *metod varijacije konstanti*, *metod generirajućih funkcija*, *metod faktorijskih redova* i *Z-transformacija*.

### Metod faktorizacije operatora

Ovaj metod je potpuno analogan istom metodu kao u slučaju linearnih jednačbi s konstantnim koeficijentima, gdje je imao namjenu snižavanja reda diferentne jednačbe. Dakle, ako budemo dobre sreće da uspijemo diferentnu jednačbu (1) napisati u obliku

$$(E - A_n)(E - B_n) \cdots (E - U_n)x_n = r_n, \quad (2)$$

i pri tome odredimo operatore  $A_n, B_n, \dots, U_n$ , moguće je toj jednačbi sniziti red za jedan.

### Primjer 1 Riješiti PPV

$$x_{n+2} - (n+2)x_{n+1} + nx_n = n, \quad x_1 = 0, \quad x_2 = 1. \quad (3)$$

**Rješenje.** Pokušat ćemo datu diferentnu jednačbu da napišemo u obliku (2), a s obzirom da je ona drugog reda, to znači u obliku

$$(E - A_n)(E - B_n)x_n = n, \quad (4)$$

gdje su  $A_n$  i  $B_n$  operatori koje treba odrediti.

Lijevu stranu jednačbe (4) sada možemo pisati kao

$$\begin{aligned} (E - A_n)(x_{n+1} - B_n x_n) &= x_{n+2} - B_{n+1}x_{n+1} - A_n x_{n+1} + A_n B_n x_n \\ &= x_{n+2} - (A_n + B_{n+1})x_{n+1} + A_n B_n x_n. \end{aligned}$$

Uporedivši to s lijevom stranom jednačbe (3), dobijamo

$$A_n + B_{n+1} = n + 2, \quad A_n B_n = n. \quad (5)$$

Iz druge jednakosti u (5) vidimo da možemo probati sa ove dvije varijante:  $A_n = nI, B_n = I$  ili  $A_n = I, B_n = nI$ . Uvrštavanjem u (4) i upoređivanjem s (3), zaključujemo da u obzir dolazi varijanta  $A_n = I, B_n = nI$ . Dakle, vrijedi

$$(E - I)(E - nI)x_n = n.$$

Uvedimo smjenu  $y_n = (E - nI)x_n$ . Tada jednačba (3) prelazi u diferentnu jednačbu prvog reda

$$(E - I)y_n = n,$$

čije je rješenje

$$y_n = (E - I)^{-1} n = \Delta^{-1} n^{(1)} = \frac{n^{(2)}}{2} + c_1 = \frac{1}{2}n(n-1) + c_1.$$

Sada imamo

$$(E - nI)x_n = y_n \Leftrightarrow x_{n+1} = nx_n + \frac{1}{2}n(n-1) + c_1,$$

što je linearna diferentna jednačba prvog reda, čije je rješenje dato sa

$$\begin{aligned} x_n &= \left( \prod_{i=1}^{n-1} i \right) x_1 + \sum_{r=1}^{n-1} \left( \prod_{i=r+1}^{n-1} i \right) \left( \frac{1}{2} r(r-1) + c_1 \right) \\ &= \frac{1}{2} \sum_{r=1}^{n-1} \left( r(r-1) \prod_{i=r+1}^{n-1} i \right) + c_1 \sum_{r=1}^{n-1} \left( \prod_{i=r+1}^{n-1} i \right) \\ &= \frac{(n-1)!}{2} \sum_{r=1}^{n-1} \frac{r(r-1)}{r!} + c_1 (n-1)! \sum_{r=1}^{n-1} \frac{1}{r!}, \end{aligned}$$

jer je  $x_1 = 0$ . Kako je  $x_2 = 1$ , za  $n = 2$  odavde dobijamo

$$1 = x_2 = 0 + c_1 \Rightarrow c_1 = 1.$$

Prema tome, rješenje datog PPV je

$$x_n = \frac{(n-1)!}{2} \sum_{r=1}^{n-1} \frac{r^2 - r + 2}{r!}, \quad n = 3, 4, \dots \quad \clubsuit$$

### Metod faktorijelskih redova

U ovom metodu pretpostavljamo da je rješenje diferentne jednačbe u obliku tzv. *faktorijelskog reda*, odnosno, reda padajućih faktorijela

$$x_n = \sum_{k=-\infty}^{\infty} c_k n^{(k)},$$

gdje su  $c_k = 0$ , za  $k < 0$ . Uvrštavanjem u datu diferentnu jednačbu, dolazimo do relacija iz kojih možemo odrediti nepoznate koeficijente  $c_k$  (slično metodu stepenih redova u diferencijalnim jednačbama).

#### Primjer 2 Riješiti diferentnu jednačbu

$$(n+1)x_{n+2} - (3n+2)x_{n+1} + (2n-1)x_n = 0, \quad n = 0, 1, 2, \dots$$

**Rješenje.** Datu jednačbu možemo pisati kao

$$\begin{aligned} &(n+1)E^2x_n - (3n+2)Ex_n + (2n-1)x_n = \\ &= (n+1)(\Delta + I)^2x_n - (3n+2)(\Delta + I)x_n + (2n-1)x_n, \end{aligned}$$

odnosno,

$$(n+1)\Delta^2x_n - n\Delta x_n - 2x_n = 0. \quad (6)$$

Pretpostavimo da je rješenje te diferentne jednačbe oblika

$$x_n = \sum_{k=-\infty}^{\infty} c_k n^{(k)}, \quad (7)$$

gdje su  $c_k = 0$ , za  $k < 0$ . Sada imamo

$$\Delta x_n = \sum_{k=-\infty}^{\infty} k c_k n^{(k-1)}, \quad \Delta^2 x_n = \sum_{k=-\infty}^{\infty} k(k-1) c_k n^{(k-2)}. \quad (8)$$

Zamjenjujući (7) i (8) u (6), dobijamo

$$\sum_{k=-\infty}^{\infty} k(k-1) c_k n n^{(k-2)} + \sum_{k=-\infty}^{\infty} k(k-1) c_k n^{(k-2)} -$$

$$- \sum_{k=-\infty}^{\infty} k c_k n n^{(k-1)} - \sum_{k=-\infty}^{\infty} 2 c_k n^{(k)} = 0. \quad (9)$$

Koristeći od ranije nam poznatu činjenicu

$$n n^{(m)} = n^{(m+1)} + m n^{(m)},$$

(9) možemo pisati kao

$$\begin{aligned} \sum_{k=-\infty}^{\infty} k(k-1) c_k \left[ n^{(k-1)} + (k-2) n^{(k-2)} \right] + \sum_{k=-\infty}^{\infty} k(k-1) c_k n^{(k-2)} \\ - \sum_{k=-\infty}^{\infty} k c_k \left[ n^{(k)} + (k-1) n^{(k-1)} \right] - \sum_{k=-\infty}^{\infty} 2 c_k n^{(k)} = 0. \end{aligned}$$

Promjenom indeksa u pojedinim sumama, nakon sređivanja, imamo

$$\sum_{k=-\infty}^{\infty} \left\{ (k+2)(k+1)^2 c_{k+2} - (k+2) c_k \right\} n^{(k)} = 0,$$

odakle slijedi

$$(k+2)(k+1)^2 c_{k+2} - (k+2) c_k = 0, \quad k = 0, 1, 2, \dots,$$

odnosno,

$$(k+1)^2 c_{k+2} - c_k = 0, \quad k = 0, 1, 2, \dots$$

Odavde je

$$1^2 c_2 - c_0 = 0, \quad 2^2 c_3 - c_1 = 0, \quad 3^2 c_4 - c_2 = 0, \quad 4^2 c_5 - c_3 = 0, \quad \dots,$$

to jest

$$c_2 = \frac{c_0}{1^2}, \quad c_3 = \frac{c_1}{2^2}, \quad c_4 = \frac{c_2}{3^2} = \frac{c_0}{1^2 \cdot 3^2}, \quad c_5 = \frac{c_1}{2^2 \cdot 4^2}, \quad \dots,$$

pa konačno se dobije opće rješenje date jednačbe

$$\begin{aligned} x_n = c_0 \left[ 1 + \frac{n^{(2)}}{1^2} + \frac{n^{(4)}}{1^2 \cdot 3^2} + \frac{n^{(6)}}{1^2 \cdot 3^2 \cdot 5^2} + \dots \right] \\ + c_1 \left[ n^{(1)} + \frac{n^{(3)}}{2^2} + \frac{n^{(5)}}{2^2 \cdot 4^2} + \frac{n^{(7)}}{2^2 \cdot 4^2 \cdot 6^2} + \dots \right]. \quad \clubsuit \end{aligned}$$

### Zadaci za vježbu:

3.2.28

i

3.3.33-3.3.38